



柳田文庫
文庫11
D 85
12



文庫 11

D 85

12

清容居士集卷第三十五

內制

元 袁 桷 撰

昭憲元聖皇后謚冊文

德合乾元母儀正而宸極立道參泰治王化基而國本寧
 靖思保佑之功宜慎欽崇之典有嚴祔禮爰重尊名欽惟
 太皇太后陛下淵靜體仁齊莊秉度憂勤潛邸清謚治朝
 內教洽乎宮庭懿範著于海寓寔生二聖光于前聞用貽
 沖人纂茲丕緒方將樂怡愉以承至養率恭儉以挹太和
 痛鑿輿之莫旋儼珠衣之如在謹遣某官奉玉冊玉寶上
 尊謚曰昭憲元聖皇后伏惟靈承顯冊陟配宗祧錫羨家

清容居士集卷第三十五

直稼堂叢書



010190555424

48-12139

邦永延祚允

英宗皇帝謚冊文

瑤圖纘緒神已御於鼎湖玉冊揚休禮宜陞於太室悼降年之不永儼立政以如新爰述徽猷以傳信史欽惟皇帝陛下文明天縱剛健日嚴辨姦邪於嗣位之初彤廷祇畏廣儀注於治朝之際清廟肅雝絕封敕以杜儉人申憲章以勵多士罰茲無赦令必惟行君臨三載而有成知周萬物而莫隱豈運逢艱否大命靡終然號謹追崇尊名是著謹遣某官奉玉冊玉寶上尊謚曰睿聖文孝皇帝廟號英宗伏惟炳靈有赫歆格無違祔于新宮以妥以宜

皇后冊文

皇帝若曰在昔正始之道必先內治于以奉承宗祧化成天下朕嗣大歷服祇循憲章宜資配助用彰位號咨爾皇后淑慎柔嘉遵道是行輔佐王邸謙抑自持寔生元子國本斯建興龍舊鎮介子紹封粵若臨御之初贊畫計慮厥相維多正位中宮天神協祥今遣某官授爾玉冊寶章坤順承天人道攸則表正母儀萬方是觀惟躬儉節用則徽音是嗣惟求賢審官則私謁靡干匡朕德格朕心實爲有賴詩書所稱罔專美于前代噫敬厥初終有慶尙其念哉以膺爾景命

特命右丞相詔

帝王之職在論一相于以表正百司綱領庶績朕纂承不

緒勵精求治然而澤有所未洽政有所未舉豈委任之道有遺缺與今特命中書左丞相拜珠松年案舊作拜住為開府儀同三司上柱國錄軍國重事中書右丞相監修國史一新機務使邪正異途海寓又康以復中統至元之治所有便民條畫具列于後云云於戲朝廷既正著端本澄源之功風俗斯醇廣摩義漸仁之化咨爾有眾體予至懷

戒飭曲阜廟學詔

郡縣廟學崇奉之制所從來尚矣乃者大臣言曲阜廟學勅建聿新將嚴飭以風厲四方朕甚慕之惟夫子之道行于天下崇教立化實始於魯可不知其所自與有司其益加明絜屏遊觀嚴汎掃以稱創立之美敬而勿褻神明之

道也苟完以教夫子之訓也其盡心焉毋怠

閭阜山萬壽崇真宮加大崇真萬壽宮詔

朕慨慕希夷式瞻殊勝蜿蜒磅礴之所茲神必靈虛靜恬惓之徒其用彌廣睠彼仙翁之化境曰惟江右之名區历年滋多嗣教不墜形而下者謂之地茲實景山神而明之存乎人載加美號承天之大與國無疆

試進士策問延祐五年三月六日進

制曰蓋聞昔之聖人垂衣裳以成無為之治稽於書傳任賢設教品節備具諄諄然命之矣是無為者始於有為也事久則弊唐虞之世历年滋多不聞其有弊也治莫重於定國體尊國勢綱常之分嚴風俗之化一國體定矣善惡

之類明賞罰之制宜國勢尊矣廉遠堂高上下之辨也量
才授官莫得踰越國之大柄也若是者其道何以臻此記
曰禮樂刑政四達而不悖王道備矣夫禮以防民樂以和
志刑以禁暴政以善俗四者何所先也夙夜浚明卿大夫
之德也知其邪慝則知所以儆之知其困窮則知所以振
之爲吏習常恬不知省其故何也繼體守文善論治者尤
以爲難朕承累聖之不緒宵旰圖治罔敢暇豫於變時雍
若有缺然者子大夫觀乎會通酌古今之宜毋迂言高論
以稱詳延之美朕將有攷焉

試進士策問

泰定元年三月六日進

制曰朕聞自昔聖王之治天下罔不在初政故舜之嗣位

也明目達聰命九官咨十有二牧禮樂刑政之道粲然備
具禹成厥功祇承于帝精一執中實聖聖傳心之要湯黜
夏命以克綏厥猷爲本武王勝殷首訪于箕子天人之際
明矣詩之訪落公劉書之無逸立政亦惟成王嗣服之始
君臣交修以成繼志述事之業唐虞三代其揆一也維我
世祖皇帝聖神啟運時則有同心同德之彥效謀輸忠故
能混一區宇治化旁洽朕祇承丕緒永惟帝王事功見於
經傳悉遵而行之時有古今制宜損益若稽世祖之宏規
遠略垂統萬世夙夜寅畏以圖治安然人才之列於庶位
者猶若未及治道之達于庶政者猶若未備子大夫其以
前王之坦然明白可行於今者何策世祖政典之綱領當

今未盡舉行者何事宜悉心以對以輔朕惟新之治

先農祝文

仲春令月原陸勸耕祇率舊彝以陳明祀惟茲艱食稼政允修相其陰陽迄獲豐庶

司耆祝文

春土方興曰耜曰耒聿修耕籍庸薦常事維神功協先農種斂是司除蓄布社以成善歲

太歲祝文

年熟於酉曷敢震驚傷功在初率循其舊爰立寢宇匪曰廣居尚訖相成以祈寧謐

后土祝文

至哉坤元以靜為主匠石踰年寧免震疊寢宇畢治庸復其初敢伸揭虔克相終事

五方帝祝文

五行之用相須以成維神司之萬物以靈相彼土宇撓神實多引誠致祈勿謹勿訶

立皇太子告太廟祝文

列聖延洪纂嗣大歷國本聿嚴太后有訓親王大臣僉言允同日嫡曰長茲惟主器將建冊命首告于宗廟

西鎮祝文

地道靜專載物惟職震竦失恆咎徵莫測側身內修秉德若惕慎其政刑爰別淑慝乃戒輔臣香冊昭格籲復故常

以底寧謐

司天臺祭告祝文

太陽

煌煌大明浴光咸池不冒八表出震見離揆時朱明中街
御輪體乾以行庶物駢臻法茲照臨實予一人爰絜芬祀
庸遂民因

太歲

歲行歸終福祿是惇四時秉權百神攸遵禮有報祈德用
兆民時將平分雨暘協宜綏此金穰物無癘疵

太衝 本命

卯爲春門品物彙滋受命自天集茲蕃禧聿嚴省方高明

謹時大德曰生繫震是出順陰養陽罔敢暇逸肅迎元本
多祐有秩

勝先

鶉火之宮司南秉陽時維長養品物用章繫月之恆儷日
以光茲實命元受福無疆芳薦式陳莞簟錫祥

金星

金精呈輝配日後先遇伏斯晦厥用不偏清商助威睽睽
導前爰庸預祈以相坤寧吉蠲匪瀆穀是膺

火星

執法麗天俯承太陽日茲羸縮厥有故常飭德省躬導迎
景光陽居大夏翼翼靡違順軌合躔德馨是祈

土星

昭哉填星德隆倭遲煜煜中黃百穀阜滋斟酌元氣導迎
丕基照臨元命肅將以祈嘉薦苾芬畱俞靡違

氏宿

蒼龍首東茲維宿殿界于卯辰靡有忒僭象緯或凌日有
成憲彼不順行曷敢適從虔命宗祝監茲寅恭

房宿

巡狩事嚴百司靡寧率彼徒御與言宵征天星之精實爲
準繩凌伏愆常推策布程蘭席令芳祇迎展誠

心宿

布政于宮上稽明堂維茲日永法天以行五緯疾遲渾象

森著謂數實然嗣服彌懼祝冊致詞式筵菲具

尾宿

析木天津燕都所次維昔初基相攸塗墍民用不頗益遐
以治靈臺考古庸啟震悸善言維從式致芬祀

迎神

天佑丕基一誠肅將瞻仰昊穹紫微騰光龍虎森衛鸞皇
鏗鏘降茲瑤壇八音開張碧雲紆徐肸蠲斯皇

送神

靈旂歆顧靡亟靡遲敬天之休億載維期三垣潤明五曜
逶迤玉斗宣光瑤壇受釐愴兮如存脫兮若遺

楠木殿上梁祝文

揆時夏季維土居中百堵皆作震疊是恐百日以成帝令
攸式棟隆之初以底元吉

崇真萬壽宮設醮齋文

序推良月式符坤厚之光誠揭層霄虔致泰元之祝竹宮
汛潔藥笈宣揚伏願神御顧臨靈旂昭格玉衡齊政永綏
有道之長寶籙延年誕啟無疆之壽三宮悅豫四海乂安
生而康乂以慈爲寶遂億載之怡愉

皇帝本命長春宮祈福齋文

獻歲肇春懋對亨嘉之序祈天永命式臨元本之辰矯首
層霄延真殊館伏願祥開泰治道合乾剛綏萬邦而致豐
年咸躋仁壽錫五福而建皇極迄底雍熙

青詞

陽和肇歲宜與物以皆春元本建辰敢自天而申命顙尊
爲大祇翼若初伏願帝鑒不違神功溥運成四時之玉燭
允協昇平展億載之瑤圖恪依覆燾

昊天上帝青詞

皇極建中密運生成之造元穹垂象益嚴寅畏之誠禮謹
祈禳功深保佑伏願靈旂下令景緯順躔發政施仁迓丕
基之永固側身修行迎嗣歲之嘉祥

清容集卷三十五
崇真萬壽宮設醮齋文

歲慎省方爰恪遵於祖訓秋嚴報禮庸祇奉於元科演繹瓊章敷陳瑤席伏願靈旂昭假叶氣周流玉燭常調遂家給人足之願黃圖永固致兵寢刑措之風

青詞

嗣守丕基心靡違於寅畏導迎繁祉歲恪謹於修崇維德在秋自天申命伏願祥雲開瑞景曜宣光怡愉永康受介福於王母清寧無斃錫皇極於庶民

皇太后爲皇太子祈福設醮齋文

天威不遠好生洽于民心帝訓孔昭受祉施于孫子誠深保佑禮盡禱祈伏願飈馭肅臨雲輿駢集鴻圖鞏謐允諧

載物之功燕翼綿宏永保貽謀之吉

青詞

正位宅中恪守成於祖武承天順則庸徼福以孫謀矯首叢霄傾誠璇極伏願玉衡齊政金篋賜齡重輪重暉誕保無疆之慶有嚴有翼永恢長治之規

長春宮散壇青詞

祈報聿嚴儼神光之下顧精誠允格荷帝命之密符第祿攸宜際蟠均慶伏願歲成玉燭改叶璣衡孔蓋繽紛歸三千之寶所瑤壇馥郁拱百二之皇圖

興聖宮上梁文

旭日蒼龍聳帝京之積翠層霄彩鳳流阿閣之霏煙巍成

少廣之居盛極東朝之禮欽惟殿下道師清淨性合儉慈
色石補天法女媧之妙用瑤池錫宴符王母之長生穆如
薰風之自南粲若眾星之拱北陛下孝嚴溫清敬謹膳羞
謂神遊泰初當廣鬱儀之宇而養以天下益新長樂之宮
庶民子來百堵皆作倚空繡柱峩峩太乙之揚旌鬪角雕
檐奕奕飛廉之奏舞彩宇周遭於禁雉寶華流曳於驂鸞
匠石繕完著龜告吉舉修梁於地上川嶽無譁成巨構於
城中雲霞得色敢伸善頌庸贊昌辰

拋梁東天雞初唱日輪紅漢殿瓊卮稱萬壽堯階寶扇
擁重瞳

拋梁西三素雲扶鳳輦低闈苑碧桃聞已種廣寒靈藥

不須攜

拋梁南薰風殿閣聳眈眈一色花光濃似酒十分松露
滴如藍

拋梁北帝子天孫來侍側何須玉檢告昇平擬把瑤編
增鏤刻

拋梁上仙藥輕調承露掌龍圖載見贊無爲魚夢維占
歌有象

拋梁下女史未須夸鄧馬聖德重歌韓愈詩徽音願續
周王雅

伏願上梁之後坤元光大鼎命延宏雲需湛露之恩德廣
陽春之澤松茂柏悅三宮同億載之歡鳳散雨濡九有順

清容集卷三十五
四時之序與天齊壽率土歸仁

皇太后寢殿上梁文

璇宮擁翠刻姑射之層山柏寢通雲儼廣寒之寶所凝神
清淨協德順承皇太后養備東朝尊臨北極天純佑命握
四時而品物亨夕以安身御六氣而陰陽理寶典淡調於
玉燭珠星連緯於紫躔陛下禮謹家人孝行天下謂榮觀
合老氏之要道而廣居乃亞聖之至言令月書春惠風司
律瑤池湧地龜吐瑞以成形畫棟騰雲燕銜文而獻秀髮
十二樓之縹緲開億萬載之怡愉工師肅給以無譁多士
懽呼而稱慶修梁舉地率土皆春敢集歌謠庸伸贊祝
拋梁東髮髯神君下壽宮絳闕雲光催曉日翠簾花影

颺春風

拋梁西靈杵元霜煉紫泥露下隄知金掌溼參橫坐見

玉繩低

拋梁南咫尺天居接蔚藍底用麻姑擘麟脯共看帝子

引鸞驂

拋梁北色石神功參太極物無疵癘樂豐年道合希夷

超至德

拋梁上紫微鈎陳肅元象五兵不試太平年三聖重光

天下養

拋梁下內宴傳歡慶朝野遊魚漸識柳邊舟飛鳥時隨

花外馬

清容集卷三十五
伏願上梁之後乾清坤謐月穆星俞擊壤而歌阜康結繩
以復淳厚千萬年永清於四表九五福悉萃于三宮

楠木殿上梁文

天道不言而庶類亨式嚴居所聖人無爲而天下治爰法
當陽坐朝知問道之勤側席審思賢之念揆辰考室申令
鳩工欽惟陛下守位建中施仁濟眾陋竹宮之侈靡羞桂
館之虛無宣室受釐未遑鬼神之間石渠論奏是資經術
之明掄榘楠以擬棟梁審律度以合規矩爰居爰處乃寢
乃興歌庶民之子來形四方之風動虹梁歡舉龜墨告從
敢述輿情庸伸善頌

拋梁東一朵紅雲泰嶽峯絳闕翠旌浮曙色玉階星弁

整朝容

拋梁西王母傳宣曼壽齊漏下銅壺催蜜炬庭傳丹詔

擁金泥

拋梁南薰風殿閣靜潭潭帝子承顏催鶴駕宗王侍宴

擁龍驂

拋梁北紫微熒煌儼宸極五兵奏凱一車書萬國來朝

合圭璧

拋梁上玉燭金穰契元象陽剛淡法泰元尊至孝力窮

天下養

拋梁下百穀芄芃滿原野淳風再使比義黃雅樂重宣

繼磬夏

伏願上梁之後乾坤合德日月順行高拱穆清景化溥霑
於八表茂迎穰簡嘉祥均被於三宮率土歸仁與天齊壽
普慶寺後殿上梁文

積翠凌空儼諸天之層構側金布地成四梵之妙緣惟我
皇帝陛下味道圓明宅心清淨深植善本靈山之付囑未
忘廣種福田寶所之莊嚴彌奐像設參前而山立威儀殿
後以雲趨一一青蓮層層貝葉爰以棲神而凝睇亦云澄
觀以集思成祇樹園作平等觀虹梁將舉龍象具瞻

拋梁東瞿曇瑞世日輪紅一手指天呈實際九旬談妙
演宗風

拋梁西雪山深處鵲巢低白足赤髭隨地見紺眉青眼

倚巖棲

拋梁南要看彌勒與同龕擊竹莫參朝九九拈鎚且問

後三三

拋梁北大地山河光的的平齊斗柄布王春淡拱宵衣

開壽域

拋梁上堯仁如天高蕩蕩八風不動太平年四時平分

眞實相

拋梁下川后山君擁風馬赤麟白雁奏郊丘瑞麥嘉禾

徧原野

伏願上梁之後後天不老景緯齊光玉檢七十二君同觀
三脊金輪萬八千歲共拂銖衣四海永清三宮均慶

天慶寺佛殿上梁文

寶構凌空稱華嚴之富貴青蓮湧地成祇樹之神通雪堂老禪心匠虛明性宗真淨住南城數十載名滿江湖祝北闕億萬年日嚴香火雖紺宇禪局之已敞而璇題祕殿之未雄靈山之法會如新繡展之綸音已下無踵而至不日以成繡裳結飛霞稱由旬之龍象金波麗鳩鵲儼第一之人天爰舉修梁敢陳口號

拋梁東須彌初見日輪紅願上吾皇千萬壽銖衣拂石宴春風

拋梁西一朵紅雲映日低不用親遊天竺國只今寶所總菩提

拋梁南軒窗面面是瞿曇欲問拈花微笑意雪堂老子

睡方酣

拋梁北殿角采暎如翠織鐘魚解作梵王音日把心香

祝宸極

拋梁上大雄之尊壽無量聖朝方是太平初白馬迎經

踵三藏

拋梁下禪板蒲團不須假側金布地擬諸天香鉢如雲坐長夏

伏願上梁之後乾坤泰治日月恆新豐年調玉燭之和正法拱金湯之固兩宮萬壽四海一家

天壽節致語

洪範九五福曰壽允屬至人上古八千歲爲秋實名治世
仰天門之蔥鬱審雲闕之青園黃道日明式紀老人之次
金莖露肅有開上聖之祥慶浹叢霄歡騰穀旦恭惟皇帝
陛下穆清居位剛健體元雷在地中消羣陰於旣長風行
水上示景命於方來辟雍建崇化之規象魏布新民之法
以食爲本歸漕粟於中都所寶惟賢卻貢瑛於絕域方且
端冕以聽古樂惡酒而好善言麴蘖相臣簫勺多士瞻鳳
皇來儀之瑞歌鳧鷖守成之詩克叶禹謨丕光周道某等
伎陳九奏曲合三呼蘭有秀菊有芳願敷宣於律呂月重
輪星重曜行登載於歌謠遙望天威敢陳口號
義和御日上蓬瀛盛日瞳瞳集壽星冠珮雲排朝帝闕笙

鏞春響藹宸庭瑤池已獻蟠桃實玉殿初開五葉莫要識
吾皇清淨理長生瓊液養脩齡

清容居士集卷第三十五

昔皇朝肇興其主與亦養節儲
 春晉諸侯或此日物儲時實王
 漢漢開正葉葉嬰瑞

清容居士集卷第三十六

元元袁同柄尚讓承人世之

外制

翰林學士承旨榮祿大夫知制誥兼修國史遙授
 平章政事閣復贈光祿大夫大司徒上柱國追封
 永國公諡文康

聲音與政通辭莫先於風雅易簡而理得治實效於乾坤
 維昔先皇歷選羣彥一道德以垂統嚴誥命以興文奉璋
 孔峩執簡有度攷諸遺老號稱名臣具官某學博而智周
 材新而意古山立陽休之儀表望重縉紳日光玉絜之詞
 華才工黼黻進揆臣而堅國是避政柄以守儒榮畫旨尙

清容集卷三十六
方密勿淡符於上意澄清外服咨諏慎考於民風人物著
龜典章衡石遽告休而還里終辭徵以養年脫屣如歸逝
川滋遠噫德輿制詔早已類於人間居易詩文今果傳於
身後載加褒恤式克欽承可

妻李氏贈永國夫人

魯侯燕喜之歌褒其令美敬仲皇飛之卜後將蕃昌事不
偶然理難固必具官某妻某氏韞玉養德佩蘭襲芳規矩
不出於廳屏律呂永諧於琴瑟守大家之戒靜慎而禮法
自防誦季女之詩恪恭而祭祀有度命之不淑報也宜豐
噫茅土竝封亦旣慰文儒之願元堂同宥尙欽承人世之
榮可

翰林學士承旨榮祿大夫知制誥兼修國史劉賡贈

三代

曾祖淡贈昭文館大學士資德大夫追封邢國公

諡康穆加上護軍

泰山之雲起膚寸而成雨黃鍾之律累銖黍以立均德胚
胎於前人澤膏沐于後嗣具官某曾祖某持身圭璧篤學
巾箱清白儒科曩共誇於鄉黨丹青帝制今復見於階庭
念昔干戈攘擾之艱唯汝詩書種殖之懿旣開公社載廣
王勳噫天勝人人勝天事果成於昭代子有孫孫有子慶
永萃於一門增秩便藩疏恩冥漠可

祖肅中書左三部尙書商議中書省事致仕贈推

忠贊治功臣金紫光祿大夫大司徒追封邢國公
諡文獻加贈上柱國

乾坤清夷真主昇而四海一風雲際會英傑出而庶績凝
篤生股肱之臣能總喉舌之職直惟熙運爰立鴻勳具官
某祖某學博而通方才長而守正讀易悟損益之理觀文
參忠質之宜中歲投閒卒起裴度於既老平居緩獄審知
定國之將興廟堂咨國是於著龜朝野係民瞻於柱石家
聲允似子承曳履之榮書種有傳孫擅掌綸之美用永厥
世以等其功噫四世三公亦既推赫奕之懿一門萬石尙
毋忘孝謹之思可

祖母鄭氏贈邢國夫人

王臣外勞動資邦媛冢婦中饋訓立闔儀具官某祖母某
氏佐餽靖共持家澹素縑緗整比齊襟拱立於北堂錡釜
絜蠲斂衽儼趨於南澗子先仕顯孫復文榮噫沃壤再疏
足示龍光之赫奕芳猷未遠尙瞻象服之委蛇爰詔後人
式共爾位可

父愨中奉大夫護軍彭城郡公加榮祿大夫大司
徒柱國封邢國公

帝堯雍熙擊壤之民鼓腹漢文寬厚扶杖之叟厖眉念累
聖之仁恩俾遺老之壽俊具官某父某脫棄軒冕徜徉里
閭誦讀詩書邈矣師承之舊陟降籩豆優然孺慕之思壯
年幹蠱以裕如晚節撝謙而泰定言追古往耄及意新種

樹養生默合三槐之故事巾車訪俗有符五柳之曠懷亨
嘉真磻水之師朝著仰商山之皓兒年希有世號少儔噫
周公拜前益慎威儀之則韓侯受命母忘偃僂之恭可

母彭城郡太夫人李氏追封邢國夫人

貴子而不及親施仁宜厚揚名以之爲孝報德是先禮有
追崇恩推錫賚具官某母身同隱遯性一柔嘉蘋藻恪共
於春秋絲麻力勤於夙夜執喪慟絕竟三日而始蘇佐餒
權遠遽中年而長往是生賢嗣爰顯清朝噫翠輅魚軒亦
旣極小君之寵蜜章鸞誥尙再疏下泉之思可

妻冀氏彭城郡夫人追贈邢國夫人

月圓而魄虧理或可詰劒成而神化物莫能推念茲偕老

之盟言詎意中道而淪世具官某妻秉芳蘭茝佩矩珩璜
奉舅姑以無違處娣姒而彌度年之不淑生也有涯噫鄉
國大邦追錫永光於窈窕泉臺佳氣周流宜見於焄蒿可

妻廖氏封邢國夫人

相夫之道靜淑是師承祀之儀絜蠲惟謹故貴得以從其
爵而教必先修其身具官某妻執禮奉盈守德珮玉事舅
嚴雞鳴之問逮下審桃天之宜噫小君實諸侯之妻惟謙
抑可以長保鉅鹿乃邢子之國惟儉素足以久安毋替戒
詞以底終吉可

集賢侍讀學士中奉大夫李侗贈祖父二代

祖懋河東宣撫檢察使贈嘉議大夫吏部尙書上

輕車都尉追封冀寧郡侯諡文惠

乾坤轉旋臣擇君而審事風塵膠轕民後后以求生匪資
談辯之折衝曷得從容而完聚昔有俊士聞于當年具官
某祖懋沈鷺決機秋毫析理不背時而棄利魯連感燕將
之風能因危以爲功陳康歸蕭王之智按堵復鄉閭之舊
開田廣井邑之繁全逃民山寺之中沒猶有祀憐故帥孤
城之守許以自新謂宜膺仕之軒飛乃獨急流而高避菟
裘嘯傲合難兄難弟之權犢車雍容追某水某丘之勝才
不大用德遺後人噫維此冀方存憂深思遠之旨嗟爾孫
子篤尊祖貴始之誠賜履舊邦克昌允嗣可

祖母張氏贈冀寧郡夫人

婦人內訓愈久則事莫可稽聖朝鴻恩雖遠而澤益加厚
錫類者教民之本顯親者繼志之基具官某祖母張氏語
簡以嚴心靜而正斂容似玉家庭服其母儀飭坐如山鄉
閭師其懿德益昌爾後克底于成噫貽厥子孫不負窀窆
之願烝昇祖妣爰疏湯沐之封營魂有知寵光無斃可

祖母某氏贈冀寧郡夫人

孝治天下教必本於興仁惠及萬方禮莫嚴於尊祖爰念
瀛洲之彥庸推下泉之恩具官某祖母某氏韞玉無瑕服
蘭有度采藻行潦雖承祀之顏殷靄南山黽黽勸夫之
義生子允才而不淑傳孫濟美而始昌噫一門同封聿廣
聖朝之澤三晉故壤足爲里社之榮垂世彌光終古奚憾

可

父昱成都路防城軍民總管贈集賢侍講學士追封冀寧郡公

古澗長松宜棟梁而弗施於太室韞匱美玉器瑚璉而莫致於合宮維先朝宣力之臣皆一時成德之彥才不究用沒猶可稱具官某父昱沈思而好文敏斷而濟事地生天施知民悅以阜通城高池深審人和而環守蜀爲望郡職號劇曹足食足兵流馬相迎於道上爲物爲變飛鳧疑度於雲中天不以年子由之貴噫三牲之養榮親弗逮於膝前兩谷之間錫土有光於身後式嚴嘉命爰慰九泉可

母仇氏贈冀寧郡夫人

曾參風木之悲淡嗟于身後孟宗冬筍之養得遂於生前事爲至難道無全美具官某母仇氏遵行儉素服習勤勞不見其夫之榮舜華隕露猶幸有子之似蘭茁承春肆衍衰嘉同疏追錫噫金葩錦橐益增元宅之光丹轂文軒允過板輿之樂清朝展慶故里聚觀可

母韓氏贈冀寧郡夫人

孟軻五鼎之饋禮非有踰子路三釜之悲情何可旣仕獲通貴者常有祿不逮養者何多具官某母韓氏家法儉勤母儀慈惠化治絲枲生兒承膺仕之傳恪共蘋蘩奉祀守吉蠲之度鬣封已拱口澤猶存肆推錫類之仁誕布昭天之渥噫黃河一曲千里茲實故鄉白雲孤飛太行有光前

躅烝嘗不墜褒寵如新可

妻許氏封冀寧郡夫人

君子偕老之宜國風所詠家人中饋之吉易象攸存作則
闡儀來嬪瀛彥具官某妻許氏有諧琴瑟相夫之道無違
不出廳屏教子之心彌切維靜以正既樂且康噫蟋蟀唐
都合儉禮而民始化采蘋南澗循法度而祀乃修遵錫舊
封祇承景命可

集賢大學士榮祿大夫致仕李謙贈光祿大夫柱
國追封魯國公諡文正

祚衍皇圖上聖聿開其正統教興文治鴻儒允際於清朝
四時周而寒暑成八音宣而律呂比道關運數天篤忠純

具官某藻思夙新蜚聲壯著處身閭里蔚然黃流之在中
策名搢紳煜矣錦衣之尚綱早贊青宮之善迄編金匱之
書疏傳十事之簡嚴志遂四休之安佚碑板華夏辭累貫
珠詩篇林泉語淡挾纊故老倚之爲衡石諸生仰之如著
龜大帶幅巾儼君實之在洛秀眉明目侔康成之居鄉旣
得壽以保終宜易名而廣譽土荒東魯爵列上公噫孔門
設科先德行而後文學漢廷取士首孝弟而次賢良舉世
實難唯卿無愧可

妻孫氏追封魯國夫人

夷攷儒學之彥允資賢淑之妻從游外方米帛不干其念
慮敦敘同姓籩豆式謹其威儀古有其人今見于汝具官

某妻某氏溫恭秉度禮制飭躬相敬如賓皓首不墜其繩
墨有嚴教子青燈猶課以詩書惟小君之封用加矧大賢
之忠宜錄爰伸竝命以慰九原噫起家而居有之惜未配
夫宗之貴告往而知來者庶永爲婦德之規於昭營魂哀
對天寵可

禮部尙書中奉大夫元明善贈二代

祖海贈嘉議大夫祕書監太卿上輕車都尉追封
清河郡侯諡貞惠

青桐孫枝之良雲和所植紫芝靈根之秀商山是宜隱顯
之用有時報施之效不忒具官某祖某養真巖壑策名里
間試吏緩刑卒應高門之語抱孫奇骨可勝執硯之悲器

卓犖以不羣量汪洋而莫測李翱之傳皇祖文已四馳王
通之述府君事關百世禮嚴教孝爵侈勸忠噫東壁圖書
爾尙詔後人之似故鄉湯沐益母忘昭代之恩可

祖母高氏追封清河郡夫人

珠藏九淵神光燭而愈闕蘭生空谷幽香耿而自持通塞
維時存歿奚憾具官某祖母高氏慶源演迤淑則和平種
桑而望繭絲亦云勞止樹桐而中琴瑟夫豈偶然錫類者
治世之湛恩尊祖者孝孫之美志噫爵書故里永爲粉社
之榮稱曰小君益表松阡之觀可

父貢奉議大夫驍騎尉大名縣子贈中奉大夫吏

部尙書護軍追封清河郡公諡孝靖

種德如藝木必閱世而始昌保身若奉盈惟持善者無愧窮達有命幽明不渝具官某父某孝友篤躬質直守道簞食卒安於簿領籛金始羨於縑緇不假以年益豐其報孝能繼志鬱成南陽之阡文以顯親行擬瀧岡之表肆加錫爵復舉易名噫丹詔疏恩天官實古之冢宰蜜章分土甘陵維爾之舊邦尙其營魂歆此殊命可

母弭氏大名縣太君贈清河郡夫人

孟軻大儒溪藉斷機之訓仲由至孝每懷列鼎之悲審閭範之可遵愍堂封之彌遠具官某母弭氏孝慈有度淑慎無違禮行於家蘋蘩循沼沚之素教施於子斧藻爲朝廷之光己錫鴻恩爰加再命噫九原可作鸞書啟鄉郡之尊

八座竝榮象服稱小君之號可

妻李氏大名縣君封清河郡夫人

鵲巢起家之因實原勤儉燕喜受祉之美斯爲樂康報之原者始必勞持之素者終不懈具官某妻李氏習熟女史幽閒內儀儼服笄珈執冲謙而彌下恪恭籩豆盡蠲絜以無踰百祿是迺再命而偃噫相其君子益知典禮之寅稱曰夫人毋忘主饋之訓可

光祿大夫湖廣等處行中書省左丞相阿爾哈雅

松年案舊作阿力海涯 追封太師郡王

四懸設樂必假鏞鍾之洪音八柱承天斯合明堂之巨構乾坤啟運川嶽降靈是生非常之偉人以佐統一之真主

沒且不朽德猶可稱具官某勇略致身英姿蓋世羊祜平
吳之策誰復先之楊素渡江而來何其神也據荊州以爲
之根本擣長沙以披其腹心兵勢建瓴皇威震電先皇帝
知人而善任定功以行封倬彼雲漢之章廷無儔匹享有
金石之奏位班侯王兼將相之重權契君臣之嘉會令肅
風生於細柳政成人指其甘棠念耆定爾功實有資於贊
助而大賚於廟必申錫以褒崇彌淡撫髀之思莫遂圖形
之想白雲已往青史如新噫齊岱爲鏐石城爲鋒朕已悉
皇王之大武黃河如帶泰山如礪卿允爲邦國之元勳詔
爾後人無替先德可

妻某氏贈國夫人

鵲巢起家因以爲召南之首殷雷勸義足以成大夫之行
矧江漢之舊邦昭柱石之偉績必資內助以佐高賢具官
某妻某氏澹泊無華靜專有守良玉在匱襲中美以善藏
幽蘭生林愛國香而自閔稟北庭之渾厚婉南澗之恪共
方考禮以報功爰推恩而錫類噫西平有子足彰闡範之
光魯侯令妻宜受國封之侈是惟崇德尙克歆榮可

太尉平章政事某特授太子太傅

朝廷大策慶莫盛於建儲社稷重臣禮尤嚴於敬故功參
羽翼政倚股肱具官某秉志精忠宣猷惇實黃閣調元之
始允屬謀謨青宮選士之初必先德義惟左右前後之人
正斯君臣父子之道彰噫日重輪月重光宜益資於輔導

書同文車同軌期成底於昇平往堅乃心祇若子訓可

遙授平章政事某特封秦國公

直惟龍飛之初考圖數貢爰篤鷹揚之舊崇德報功出命告廷分封啟宇具官某蚤乘熙運躬受真才絕北威名允著長城之助居中韜略密宣前箸之籌肆予纂承委以輔弼噫干戈弓矢于以昭武功山川土田斯以彰異渥祇服明命益殫嘉猷可

中書左丞某封贈三代

曾祖某贈資善大夫中書右丞追封高昌郡公諡康懿
粵昔高昌肇邦藏經史以崇儒師立校官以訓子弟所從

來久矣故其聰明才知通於聲音文字之學代不乏人具官某曾祖某誦詩讀書漸仁摩誼得於鄉里之素若雲在淵勃然以升蓄極而通至曾元而始見疏封舊寓以報流澤之無窮尙其享哉可

曾祖母追封高昌郡夫人

諸侯之制立廟以五親服未盡是猶有待於後也今爾曾孫某勤勞王家錫之山川土田而汝與封推其自則由元孫啟之先王之旨遠矣具官某曾祖母某蓄德不耀保躬益貞敷佑後人輔弼不懈曾孫之慶至于五世其昌矣今從夫爵尙承朕恩可

祖某贈榮祿大夫平章政事追封齊國公諡莊靖

赫赫在上永遵繩武之思子子爲孫爰述尊祖之義發揚
潛德追錫愍章具官某祖某明珠媚淵良玉韞匱言寡尤
行寡悔祿不願干旋中矩折中規動無踰則養真於攘擾
之際味道於沖漠之初本碩枝繁源深流遠噫稽尙父之
返葬咸謂分封仰周公之拜前允宜淑後載嘉正直庸受
寵綏可

祖母追封齊國夫人

蘭長空林羞當戶以自獻珠生巨海懼媚川而深藏矧爲
隱約之時曷表殊絕之行婦德永闕孫賢可推具官某祖
母某孝敬行於家門肅雖傳於閭里念昔日艱難之際爲
善是持至歷年磅礴之多興宗有驗恩分沐邑賚廣脂田

噫綺繡冰紈莫慰生前之願文軒象服足爲身後之榮可

父某贈銀青榮祿大夫大司徒追封齊國公諡恭
惠

大明麗天羣陰伏于葦室寸雲出岫甘澍徧于寰區崇德
報功之典存繼世象賢之制著惟勳是錄于禍有光具官
某父某潛珍養名砥節礪行王明受福井渫不食非所憂
父教爲忠羸金之藏奚足羨事久斯定時至乃亨念爾嗣
之宏文生聞孫而佐治蟬聯朝著磬折里閭維積善之粹
精宜流澤之溥博詢于集議庸爾展恩噫泱泱大風知紹
封而益茂謙謙終吉詔承德以靡虧可

母追封齊國夫人

積行累功允賴夫人之配承先共祭載歌季女之賢剛柔之道有恆倫紀之位斯定具官某母某氏持守貞白衣被絜清子又生孫莫計堆牀之笏善必有慶久高容駟之門議勲以褒蓋臣錫命而及賢配亶惟異數足稱營魂噫三服齊官是在昔女工之訓五鼎廟食亦庶幾孝祀之芬旌寵有光歆承無斃可

榮祿大夫宣政院使領延慶使某贈推誠佐理功
臣太師開府儀同三司上柱國追封齊國公諡文
忠

式觀景運灼考蓋臣際乾坤清夷之時承風雲亨嘉之會精忠儼在褒恤庸加具官某慎愨而行方沈潛而量厚踐

揚禁近官一品以益謙陟降邃嚴閱五朝而彌著恕能及物廉以律身經文譯潤之功淡開宗明義詩書服習之訓久教子象賢維時輔臣佐我初政墳簾雅奏圭璋令儀蓋德厚者世必昌勲著者爵宜峻誕開公府庸正師垣儼精爽以如生合神明而無愧噫保茲青社斯爲胙土之崇封以紫泥益見蜜章之重體茲申錫期爾永承可

妻封齊國太夫人

馭爵疇功錄先臣之大節疏恩竝命成賢媼之芳猷往莫追尋生宜悅豫具官某妻某秉心淵靜制行霜嚴悃悞無華佐餒唯精於五飯溫恭有恪執容儼稱於六珈是生絲綸之英復得鹽梅之佐入室每諮於慈訓揚庭爰著其母

儀噫誦齊風雞鳴之詩則貞女宜封於東土歌魯侯燕喜之頌則壽母益介於長年哀對殊恩恭承令祉可

資德大夫同知宣政院事某贈存誠秉德功臣太傅開府儀同三司上柱國追封齊國公諡忠穆

帝室興隆君臣交孚而同德王庭肅穆弟兄相繼以其爲睠若昔之揚休越今茲而錫命輿言是探郵典有加具官某植節秋霜持評水鏡待元戎於漢上屢奏凱功奉大帝於禁中益參聖諦凜有不可犯之色充然無自滿之心阿閣鳳凰虞廷屈軼績旣昭於簡冊望宜冠於巖廊噫舉賢上功爾猶存太公之生氣慎終追遠卿勿忘人主之殊恩尙其冥魂享此休寵可

妻追封齊國夫人

王言惟作命揚于庭者爲報功內訓不出門宜其家者爲合德有嘉賢媿宜盡褒封具官某妻某秉德芝蘭奉身玉雪遠行江漢之域勸義不違淡居房闈之中服勤無斁考圖定地錫命續綸噫取妻必齊蓋有資於大國從夫之爵今已謂之小君昭于幽局歆我異渥可

監察御史沙某封贈祖父母

祖某嘉議大夫行工部事專一修築宮城勾當今贈 功臣太傅開府儀同三司上柱國追

封某國公諡武敏

式考皇猷承命以永新邑爰立民極相宅以營成周輪奐

清容集卷三十六
四
彰施高深鞏固言念梓材之彥興懷械樸之官具官某祖
父某氣壹而靜專智圓而肅給順陰陽伐材木構寶殿以
如規議遠邇程土功儼金城之有截通四方而罔缺傅眾
力以聿成典制百工論道時趨於清切辨護少府使民每
減其冗煩紫闈深教以手書墨詔屢傳於宸旨亶惟際遇
允協隆平觀設施而舊跡愈彰思典刑而老臣彌重誕開
公爵復廣社封噫召公之誥簡明命庶丕作蕭相之謀宏
遠俾後無加追命煥章營魂昭慰可

祖母

女教勤閨門夫獲脩于六府皇恩洽寰宇死得慰於九原
睠惟蓋臣成手良媛具官某祖母某韞玉制行範金作程
化治絲麻宛惜日稽功之效絜清蘋藻儼承先盡職之能
用施孝孫亦克王事方褒忠以大賚爰追命以竝封噫密
印昭天益侈桓楹之表脂田廣國式崇柏板之嚴茂對有
光靈承無斃可

茶迭兒局使沙正議贈父母

父某正議大夫遙授工部尙書管領茶迭兒局人
匠總管

漢宮密勿之邃彌重細旃周廷朝會之嚴用資陰羽省方
維歲考古若今具官某父某才敏而通時慮深而應變春
秋蹕道環微廬虎士以無譁風雨屬車望帳殿翠華而有
煥綺如鹿角整若魚麗曉籌爭奮以啟行夕頓悉安其成

列舊規儼在故老能言爰開大國之封式體先朝之任噫
相王入大次禮猶想於肅雖論道惟三公恩豈殊於冥漠
詔爾後嗣祇予至懷可

嫡母

世官嗣業古罕其人工師致功今慎其職具官某母某肅
著令德恪嬪大家上承尊章察素絲五純之儉下訓子婦
審狐腋千金之難爰俾象賢式克紹後噫翟第崇貴已享
偕老之時蜜章廣恩足慰厚夜之望子能謙謹汝預寵光
可

生母

佐中饋之職必假婉柔成繼世之賢實資訓飭泉遇蹇而

利見木積小而始升具官某生母某勤勞大門光寵盛代
象服之貴宗婦攸同鸞誥之榮鄉人所羨爰相允嗣益慎
忠嘉可

資德大夫紹慶珍州南平沿邊宣慰使播州安撫

使侍衛親軍都指揮使上護軍楊漢英贈推忠效

順功臣銀青榮祿大夫平章政事柱國封播國公

諡忠宣

繼世立諸侯審象賢之有託推恩保四海在追遠以彌加
有懷蓋臣庸厚恤典具官某著德遐域效誠先朝聰敏得
於襁抱之初發于天性稚弱置於扈從之側斷自宸衷用
能絕黨殊鄰投戈納款尺天寸地負版奉圖先國後己之

清容集卷三十六
○
慮深尊主庇民之績著闡學傲文翁之化好賢師鄭武之風雅量鎮浮方橐弓而箛矢澄懷味道時緩帶以輕裘出門與折軸之悲行壘應流星之兆何以勸善必也正名循故壤以加勳衍圭田而封土青綬崇副相之貴袞衣嚴辨章之稱噫忠孝傳家于以顯昭事厥辟之實歿存錫命所宜推圖任舊人之終精爽有知欽承無斃可

妻田氏遵義郡夫人加播國太夫人

婦人中饋歌采蘋則謹其承先大夫遠行誦殷雷則審其勸義禮有準則行無過踰其官某妻田氏嬪高門之勳庸受外氏之經籍曹大家之女誠奉上克謙魏夫人之僊書教兒能學念王事靡盬之際知女子有行之宜夙夜傳恭

寒暑循度噫從夫以貴今已位於小君勉子惟忠益有光於先正茂膺異渥式介長年可

開府儀同三司上柱國錄軍國重事中書右丞相

監修國史拜珠

松年案舊作拜住

贈清忠一德佐運功臣

太師開府儀同三司追封東平王諡忠獻

八柱承天棟橈萌於巨構六飛御日輻說見於中街愍死難以成仁攷生榮而錫命具官某鼎彝王社闕閱相門自結主知應雲龍之異遇獨持國是炳著蔡之先幾陳於上者不足言見於事者爲可則斥聚斂之臣以靖四表誅黷貨之徒以正庶官庫無餘財拔葵之訓靡替門絕私謁懸衡之鑒益公天下望其治平朝廷以之模楷然盡言招過

清容集卷三十六
四十五
檢謀愈淡選賢與能姦黨滋懼變成肘腋禍延股肱川嶽
動搖日月昏翳雖元兇正罰足明朕心在壹惠易名姑慰
卿意分茅故壤增爵維垣噫未明入朝竟墮承宗之計盛
服假寐孰爲鉏麤之賢念此盡傷恩斯優渥可

妻某氏封東平王夫人

星坼中台輔弼之虧果應舟藏半夜伉儷之情曷勝死者
易名生焉從爵具官某妻某氏素系相闕克嬪王門纂組
之功弗訓以習祭祀之謹於禮無違偕老之志莫酬竝封
之恩宜厚爰增湯沐庸演絲綸噫司徒之妻問齊君以子
邑蹶父之子樂韓土以相攸宜飭諸孤以保終譽可

太中大夫內史府司馬狄琮贈榮祿大夫中書平

章政事柱國追封冀國公諡貞毅

山西諸將之英沈雄有自斗南一人之裔正直是傳爰產
魁梧之賢以贊藩輔之政具官某少植奇節壯懷孤忠朱
邸論思引經說以開導細旃密勿詢治道以彌縫挺然廊
廟之姿鬱有江海之量才見於用知無不言邊陲以之救
寧帷幄以之康濟朕纂嗣大厯圖任舊人方審象以博詢
慨撫髀而莫覩興宗有似茲爲柏臺之羽儀追遠彌加庸
進槐階之品秩噫呂望老而賜履實文王之故臣丙吉生
而受封乃悼考之遺德事莫能偶恩宜有加可

妻張氏贈冀國夫人

遠行從政閔勤勞者著壺儀修身踐言循法度者執婦道

允矣溫恭之媛疏其赫奕之封具官某妻張氏謙以自持
儉而有守酒食是議春秋之祭無違狐狸爲裘風雪之需
悉備既嘗艱阻莫遂恩榮噫兼暮入臺紹祖之傳彌振僧
孺清道思母之念益深尙其營魂承爾嘉命可

妻劉氏贈冀國夫人

展如邦媛典刑傳於大門恒兮國英謨謀見於藩邸天相
其配恩與之俱具官某妻劉氏珩璜母儀纂組女訓如璞
蘊石審玉人之琢磨若鳩在桑信君子之均一嗣爲烏府
之模楷母增魚軒之寵榮噫繼世象賢于以錄先臣之舊
慎終追遠庶幾彰盛世之光綸誥下頒營魂祇服可
清容居士集卷第三十六

清容居士集卷第三十七

元袁桷之譔

外制

太傅右丞相巴延

松年案舊作伯顏下同

贈太師開府儀同

三司

功臣淮陽郡王諡忠武

乾坤呈符構風雲之嘉會山川毓秀挺柱石之英賢夙奉
宸猷丕揚帝訓惟不嗜殺人者能得天下而可與事君者
實非鄙夫睠我元勳膺時碩望合太平之寰宇成一統之
輿圖生爲名臣歿有公論太傅右丞相巴延機沈而識遠
量重而器宏十乘啟行共服征南之妙算七騶咸駕默傳
濟北之遺編誓眾於鼓角之初過師於枕席之上具宣德

意誕廣仁聲簞食壺漿之迎咸知己後觴酒豆肉之賜士
向無前是謂制勝而屈人兵抑亦好生以全天道丞相之
功第一智士之譽無雙方謙牧以學卑愈蒙養而用晦角
巾私第恂恂似不能言雞翹屬車斷斷猗無他技肆予纘
服躬任受遺功成莫居年運而往格于皇天者有儀可象
游於造物者不見而章師尙父之崇名貞惠文之美謚益
疏王爵庸示國恩噫彝器景鐘足銘邦家之偉績蜜章綵
典斯昭泉壤之幽光尙其明靈歆此殊命可

平章政事廉希憲母某氏贈 國夫人

溫璞出於元圃貞松產於徂徠良由地氣之完以合天和
之蘊故平章政事廉希憲母某氏柔嘉維則淑慎其思采
蘋采藻之恪恭爲締爲綌之素儉奉尊章於壯歲樂其天
全率娣姒之諸郎視爲己出齊家以禮教嗣以忠用能爲
先朝社稷之臣啟奕葉簪纓之慶雖爵從夫貴莫得而加
然義以子賢當崇其本益開湯沐之侈庸增窀穸之光是
爲異恩以旌舊德可

呼圖克台默色

松年案舊作忽
答的迷失下同

公主追贈齊國大

長公主

維王展親之道實先於惇敘粵昔慎終之典尤謹於追崇
矧予同氣之賢是惟長主之貴廣疏異數庸寓至懷呼圖
克台默色公主玉海澄輝金枝毓秀充然婦德成肅雖以
爲穠李之華相其夫家閔勤勞而勸殷富之義婉順諧於

日就儉慈出於天然美王姬下諸侯固異公宮之制問我
姑及伯姊益深先朝之思胡不百年以永終譽肺腑之託
云在手足之念彌鍾圭籥荐更湯沐儼舊爰開名國下慰
營魂噫立愛惟親曷愧死生之初志以義度德莫窮修短
之大原沒而有知服之無斃可

宗正府寶哥贈祖父母

祖某特贈推誠保運翊亮功臣開府儀同三司太
尉上柱國追封恆山郡王諡忠靖

風雲初際允資佐命之賢歲月旣徂庸厚報功之典直惟
平治爰錫褒嘉具官某祖某貫日精忠凌雲節槩載橐弓
矢翊龍德於初潛以爲股肱展鷹揚而無敵噫孝文拊髀
豈惟思古之名臣顯宗圖形實欲方今於前世九原可作
千載如新可

祖母追封恆山郡王夫人

慎終追遠本先王之至仁崇德報功傳有國之令典具官
某祖母某氏從夫早貴訓子克賢如山如河之儀容宜室
宜家之愷悌肇封大國儼焉象服之新益慰九原歆此蜜
章之寵可

參知政事賈某贈官

朕丕承大業遠究前圖肇邦九有之初紀綱備舉同德一
心之彥贊畫允資慨年運之云徂儼風猷而如昔具官某
經術展緒孝廉起家侍幾微於帷幄之中保身彌謹識變

通於衡石之外得士尤多故一時出令之坦明皆先帝欲
言之旨意器能容物清不近名暨更南國之旬宣咸謂中
朝之倚任方堅退佚益避權姦活千人有封考於爾嗣德
百世而祀論乃至公爰褒賢以勸功復易名而疏爵噫方
叔壯猶之雅雖已美於盛時韋丹遺愛之碑實有俟於今
日皦如精爽綏我寵光可

淮西道宣慰使劉復亨妻趙氏贈某國夫人

圖任舊人式表世臣之重烝畀祖妣用昭孝孫之賢維德
厚者慶益長而爵貴者報必遠具官劉無隱祖母趙氏鍾
鼎望族山河令儀使節春行從子從夫之樂備女箴夜誦
爲母爲婦之道全頌臺之彥有嘉漏泉之恩采廣高堂素

象音容猶想於含飴故里佳城湯沐儼疏於刻蜜湛然精
爽歆此褒崇可

荆湖北道宣慰使劉澤妻孫氏贈某國夫人

孝治聿嚴誕布蓼蕭之澤聖謨丕顯遐思屈軼之賢念服
瘁於外庸允資成於內助恩昭竝命光慰九泉具官劉無
隱母孫氏里族高華閭儀淑慎閉戶而行盥饋曲盡婦儀
映雪以課詩書咸稱母訓梧捲之飲猶在茵鼎之養莫加
位正小君已備沼絜之德爵崇大國益摠風木之思可

參知政事趙世延贈曾祖母 氏雲中郡夫人

積德在於百年實資內訓褒封及其三世宜謂異恩勤勞
蓋臣服襲先矩具官趙世延曾祖母某氏幽蘭雅度喬木

舊傳殷雷雖閔其勤克彰忠節采繫不失其職允佐肅維
膏之沃者根必深種之豐者穡益厚顯于西土咸曰大家
維爾曾孫益彰有慶於戲秩秩先廟崇松楸柏板之儀翼
翼小君承錦誥金花之寵奉先追孝錫類興仁可

平章政事董某封贈三代

九道

曾祖昕贈光祿大夫司徒趙國公諡宣懿

大裘無文可饗于帝良玉韞璞孰窺其珍灼知遺逸之民
邁種渾圓之德克昌厥後不在其身具官董某曾祖具官
某畎畝怡愉里閭退讓開田種木澗期蔽日之輪困如山
出雲莫測爲霖之變化子能擇主孫亦象賢一門萬石之
家聲四世五公之譜牒噫慎終追遠分茅宣曾矩之光崇

德報功推本協孫枝之願直惟異渥寵爾營魂可

曾祖母李氏追封趙國夫人

岷山之源若甕而達于海至日之影如線而麗乎天信知
明道不可以計功要在積微因之而成著具官董某曾祖
母李氏盤阿共隱篋畝如賓惟耽積善之勤厥享降祥之
驗百年未遠五世其昌噫象服表儀亦旣慰賢勞之願蜜
章刻篆斯有昭孝治之隆可

祖俊贈翊運效節功臣太傅開府儀同三司上柱

國追封壽國公諡忠烈加贈推恩翊運效節功臣

依前太傅開府儀同三司上柱國改封趙國公諡

忠烈

駿命握乾誕啟中天之運豹韜宣武協成上國之光念風
雲之會匪常而日月之流如駛爰新景命以慰故臣具官
董某祖具官某被褐潛珍棄書學敵戎馬驅攘之未定志
已出塵雲龍會合之有開獨能就日察敵保臨淵之智挽
彊夸貫札之精釋兵爲農所活者眾延師教子其訓益深
馬革裹屍淡可憫生前之語虎頭食肉終有期身後之榮
惟德之厚者嗣必昌而功之著者禮必報肆朕嗣服念爾
疇庸爰廣重封以彰異數噫修祖廟陳宗器在于君臣之
交修光王室逆天休惟爾子孫之無斃精爽不昧寵渥其
承可

祖母李氏特贈壽國夫人改贈趙國夫人

殷靄勸義於昭媿德之賢柏舟作詩爰表自防之志雖內
教止傳於閨闈而懿範備著于鄉閭具官某祖母李氏淑
慎持家嚴勤訓子斥簪珥以奉賢師之饌化絲枲以助先
祭之供衡宇周旋人不識其面目闔門款洽族猶想其儀
刑雖雙鯉之養弗居而八龍之譽罔替允惟賢母有光前
聞茲子溥澤於世臣庸汝啟封於大國噫先正昭事已克
光竹帛之傳夫人起家式歆承絲綸之訓用昭後嗣永肩
一心可

父文炳特賜贈諡金紫光祿大夫平章政事忠獻
公加贈宣忠佐運開濟功臣太尉開府儀同三司
上柱國追封趙國公仍諡忠獻

君臣相資莫喻同心之美忠孝兩立斯爲佐命之殊念汗
簡曷能旣其勳而朝著猶足以優其禮維祖有訓非朕敢
私具官董某父具官某沈毅而善謀明恕而敦本黑頭試
邑棄官羞墨綬之卑赤腳從軍絕食望翠華之幸刑輕典
以安反側釋降人以靖流離白日揮戈睥睨益張其羽翼
長風破浪蒙衝竟擣其腹心命在養民市不易肆取麥禾
以陋鄭人之過收圖書以成蕭相之功嶺嶠宣威南人不
復反矣朔方請使周公方且膺之恂恂持儒者之風諤諤
挺大臣之節靖念不圖之建彌淡喬木之思格于皇天雖
儼若帝庭之陟降渙其大號必有加元宅之褒崇錫以嘉
名胙之大國掌武襲建牙之舊開司增立戟之榮九原如

生終古永譽噫英才間出足爲邦家之立基盛德無瑕成
爾子孫之逢吉載加殊命以賁營魂可

母趙氏追封趙國夫人

鵲巢推夫人之德於配實難碩人歌衛侯之妻其賢可想
具官某母趙氏秉心淑靜主饋柔嘉逮事皇姑克奉甘旨
於左右一視諸子莫窺憎愛之後先每傳家訓之忠勞遂
致孤兒之死事噫開脂田而獲上國夙謂無儔被象服以
從先塋幸哉有子可

繼母某氏追封趙國夫人

國族世貴鮮執禮以下人王臣功高適合符而媿德具官
某繼母某氏敦厚天性靜專內儀瞻彼南山渙得勸夫之

義遵于行潦不失奉祀之恭有子忠賢爲我宰輔噫推恩
三世庸疏湯沐之封錫類九原益廣蓼蕭之澤可

繼母王氏追封趙國夫人

嶰谷之竹應律而氣自鳴十洲之膠續絃而奇乃見不有
佐餽曷能相夫具官某繼母王氏組織婦工齊莊母道歲
時盥饋立蘭玉以無譁春秋烝嘗絜牲醪而有度嗣子極
中書之貴一門疏大國之封噫生也有涯莫稱魚軒之樂
死如可作尙歆鸞誥之榮可

所生母樊氏追封趙國夫人

綵衣之養莫罄其私心板輿之歡遂以爲美事念風木之
永感惜春草之寸暉具官董某所生母樊氏禮以母稱義

由子貴勞謙終吉竟莫觀垂魚擁笏之榮一視同仁乃預
享刻蜜演綸之寵允惟盛事服我異恩可

集賢大學士張晏贈二代

四道

曾祖宇贈保節功臣銀青榮祿大夫大司徒追封
魏國公諡文愍

韋孟明經諸孫之傳始貴袁安卜葬三士之言若符膏之
沃者日以光德之厚者世益遠具官某曾祖某進修家塾
退靜鄉閭乾坤轉機後后服先知之算干戈效勇舉宗成
全歿之悲命也在天幸哉有子噫忠孝一門之盛事百世
可知節義千古之大閑九原不作聿申景命庸建上公可
曾祖母常氏追封魏國夫人

盛德之報若券取償內訓之施如玉韞璞聿行尊祖之禮
益知起家之難具官某曾祖母常氏澹靜無華儉勤有素
清晨佐餽奉羔韭之肥甘晚歲謀生治蠶麻之靡密積善
有慶沒世不忘噫魯孝孫之詩宜告成於先廟魏大名之
國爰錫命於九原服我鴻恩宜惟異數可

祖英贈純德秉義功臣太保儀同三司柱國追封
魏國公諡簡懿

幽蘭空林抱孤芬而永闕長松古澗垂巨蔭以自完明其
道者不計功非其身者必在子具官張晏祖英德若不足
樂且有儀遇真主之龍興出關而俟喜佳兒之豹變潛邸
以從居官恥商權之謀接物多任俠之義念干戈首難彌
溪丘壘之思歸鄉里自娛益廣子孫之澤考其篤素允謂
安行噫于公之門少高茲言已驗畢萬之後必大今食其
封爰詔後人益光前業可

祖母劉氏追封魏國夫人

德盛起家允著夫人之懿時危秉志有高列女之風蓋在
昔以爲榮至于今而彌顯具官某祖母劉氏澡身蘭服耽
耳椿齡重闈期豕婦之興宗一札勸孤兒之入侍忍乃有
濟鑄金符緘口之銘安不忘危考室邈飛翬之制最德若
是生賢可知噫徂賚孝孫已極登瀛之貴逮事王母益疏
分國之恩幽泉有知純嘏無斁可

資德大夫江南諸道行御史臺中丞于璋贈推誠

肅政功臣光祿大夫平章政事上柱國追封薊國

公諡文簡

善人天地之紀德莫有加君子邦家之基沒猶不朽瞻懷
遺直追錫殊封具官于璋志蘊忠貞運逢熙洽慶雲甘露
氣和而動植自宜威鳳祥麟瑞應而猛鷲咸伏華要屢更
於中外靖共彌保其始終緇衣不渝素絲靡替念在昔菁
莪之彥皆先朝棫樸之功年運既徂風猷彌遠噫劉寬長
厚允宜居鼎鼐之官胡廣中庸謂當久臺閣之任事乖往
古恩渥九原咨示營魂服我休命可

妻某氏追封薊國夫人

慎終追遠先王惇俗之盛心崇德報功治朝馭臣之大勸

恩哀臺彥澤及闔儀具官某妻某氏靜淑自脩柔嘉彌謹
珩璜有節動常法於女箴圖史自娛身不逾於內則傷哉
無子貴也從夫脂田廣大國之封蜜印慰九京之望噫瑤
琴別鶴早已棄於人間寶劍化龍竟相從於泉下尙期冥
漠歆此寵光可

茅山第一峯大茅君特加封東嶽上卿司命太元

妙道沖虛聖祐真應真君

靜慕元風灼觀往事無爲曰道必刻意繕性而始成修身
乃真非積行累功而莫就大茅君奇操矯俗精思集虛壹
德齋心受龜臺西華之祕旨萬靈受職開金陵句曲之宗
壇丹光千載以如新寶氣三峯而彌固發祥肇社民到于

今稱之逆兩寧風天之所助順也宜惟作聖允合祐神孔
蓋翠旌祀莫嚴於司命瓊文藥簡禮爰謹於秩宗假茲聰
明佐予平治可

茅山第二峯二茅君特加封定錄右禁至道沖靜

德祐妙應真君

合人心理萬物禮宜順於鬼神建皇極錫庶民徵有稽於
暘雨大江以東之地句曲維望而尊土樂昇平歲稱稔足
二茅君中峯司命西華鍊形作牧審煩擾之非修真得恬
煥之要驂鸞導從填篋儼奏於雲中化鶴來歸城郭時看
於華表朕方推仁以濟眾靈宜妙物以祐民學道受之以
神端有宗於李耳望祀不祈其福誠慕淡於漢文嘉與函

生誕敷景命可

茅山第三峯三茅君特加封三管保命微妙沖慧

仁祐神應真君

氣化爲神握陰陽而執要物來能應遇水旱以成功茲山
之靈以氏爲號三茅君不導引而壽體素純爲真密從蒼
龍承左右而無間時乘白鶴侍伯仲以遠遊荷天降休爲
民請命逍遙容與服光景以如新周流常羊蒙祉福而無
極肆加褒錫丕應隆平埋鼎高峯爰慕軒轅之有道獻金
空谷方薄光武而不爲以赫厥靈同歸于治可

吳全節特進上卿元教大宗師

運開至治法簡易以合泰元教審宗傳隆繼承以明正嗣

清容集卷三十一
用揚渙號誕聳具瞻具官某孝友中乎準繩詞華鏗乎金石居無思行無慮粹然令名禮爲翼知爲時協于王度陟降紫宸而匪懈贊襄琳館而益謙藏珠在淵雲五色而川媚納息于踵風八景以星從維列聖嚴珪幣之薦以格天而乃祖受劔印之錫而展世四十餘年之帝顧卑己行權三千之徒首汝賢小心盡瘁俾超華貫爰做舊階侍清祠以表羣公度玉墀而膺六命祇若具訓允爲異恩噫奏陰陽之和以祝釐則諸福可以畢至通神明之德以事上則庶績底於咸熙守慈儉以佐無爲遵希夷而贊有道式觀素履庸佩綸言可

三十七代仙姑馮淑真特封靖明貞素夫人

紹元風而展世丕闡帝猷溥內則以疏恩勉從人爵仙姑馮氏簪纓素緒輦悅芳儀媿穀城之傳益師清淨守柏舟之操采固堅貞受祉惟淡錫名斯侈雲龍風虎之慶會竄謂有光舞鳳迴鸞之制書懋承無斁可

昭應宮提點王氏金蓮特贈淵靜元素真人

寂然不動知來去之有因湛焉長存宜死生之無間辭風雲之際會竟糠粃於世塵爰加異恩以彰殊遇昭應宮提點住持王氏金蓮早塵椒掖晚謝藥宮修崇密契於九重錫賚屢承於三接淨如止水斯爲至道之宗脫若太虛實本重元之體尙歆嘉號庸表將來可

長春宮提點常某授元門演道大宗師掌教真人

管領諸路道教所商議集賢院道教事

治國以無爲惟宗式符要道順物乃自然之理允謂至言
長春宮提點常某橐籥重元著龜萬變氣超渾沌灼知天
地之根運際昇平默贊陰陽之化方獨立以不改彌大盈
而若沖爰紹真風以彰人望噫內觀形影斯泉石之素心
外飭身名實朝廷之異渥保茲清淨俾以闡揚可

昭瑞宮提點張惟一特授全德靖明宏道真人太
一宮提點

神以知來至教匪存於象設人惟求舊褻封首錫於龍飛
念扈蹕之宣勤默儲祥而介福坤元具訓渙號揚綸昭瑞
宮提點張惟一泉石古心冰霜雅操侍晨長樂澹焉若樸
而妙感彰澄觀穆清廓乎不驚而眾虛集惟才全者德不
競而正靖者明愈昭闡道王庭葆真沖館噫有國之母以
長久爾尙謹於祝釐立天之道曰陰陽當益思於觀復恭
承嘉命助贊無爲可

廣誠靈妙演法真人江南諸路女冠諸宮觀都提
點邵靈瑞特追封宗師

二儀之生根於太極萬物之母始於有名推剛柔迭用之
原悟坤乾交泰之理茲焉觀妙足以表微具官邵靈瑞野
鶴孤標金芝內行亶麻姑之清淑允謂地靈慕南岳之沖
虛聿工草聖通章帝闕備問宮闈煜矣龍光守大盈而自
牧端然蟬蛻享上壽而弗居道氣常新仙風不墜噫女偶

清容集卷三十一
朝徹已傳宗師之篇帝堯時雍爰有化人之國錫茲美號
昭我鴻恩可

沖靖靈妙凝真法師元元萬壽宮提點盧行益龔
封真人

道要易爲功必假相傳之祕名盛難與繼益求自治之方
矧茲女冠之慎修爰出朕綍以示勸具官盧行益沖澹若
璞謹飭自繩侍藥珠之宮宣琳琅而不瀆守萼綠之訓視
金玉以如遺惟清淨者元學之宗惟簡素者師資之本斯
焉無忝足以有承噫誦赤松中誠之經卑退爲德考南岳
內傳之旨齋戒是先可

五雷宗師沖靖先生雷用光特加封五雷宗師沖

靖至德昭應真人

天地交泰而雷出奮風霆流形而物露生神行兩間因體
而始有用數合五位由柔而後成剛乃知變動之機不出
陰陽之妙五雷宗師雷用光參合太始摩盪無垠學道從
師罹厄窮而不悔救災禦患卒韜斂以如遺詢諸長老之
言考以輿圖之載損之又損承禎之語若符生而不生介
象之歸非異運隆累洽道慕重元思其人如欲見之宜加
綸誥告諸往而知來者益勵羽流可

通妙葆真先生高士易如剛特加封通妙葆真文
教真人

式觀修真之徒多出好古之士伯陽柱下習典禮而道成

宏景山中博載籍而書備高士易如剛學通羣藝妙集眾
虛師清淨以避堂可謂簡矣問鬼神而前席殆將近之韋
編之繼絕孰傳洞章之補亾猶在無文不立松風恍其步
虛與時偕行草露晞而羽化方企崇元之館爰思列仙之
居本無名而有名庸彰往古效先覺者後覺庶勸將來可

臨江路閣阜山萬壽崇真宮住持四十六代傳錄

嗣教宗師楊伯晉陞加太元崇德翊教真人

性出於無始存存爲成性之門道合於有爲生生乃得道
之奧式觀載籍爰有至人吐故納新以調其神齋心服形
以制其炁于以濟眾因茲延齡具官楊伯晉守樸丹丘潛
珍琳館止息以踵陋熊經鳥申之迂藏珠于淵握龍變虎

騰之要開九籥之祕記傳八景之元文問年今見其復丁
會月密推其納甲天台之召司馬損數術以理身羅浮之
迎軒轅徹聲色而合德朕悉茲理卿無復言聿加綍命之
殊以重羽流之選噫居安易之序所當明天地之根修身
德乃真宜益究坎離之用贊敷皇極懋協鴻禧可

毛穎達封真人

主祭丁
甲神

道萬物之奧非虛不能以通微誠百行之源惟靜斯足以
制動聿求佐理爰慕希夷茲得有恆之人以贊無爲之化
崇真宮提點毛穎達澄心止水植節貞松禮爲翼知爲時
澹然無競巧若拙辨若訥休乎有容藏名琳館之珍養粹
元門之望維昔世祖動遵軒轅占瑤光以揆五行之情通

紫煙以嚴六子之用山林肅絜星斗爛明苟非其人靈弗
顧矣不懈于位爾其勉之庸加綸誥之隆以示真卿之貴
噫乾元天下治也浚明用變之功神物聖人則之敬謹祝
釐之效有嘉恬靖永保恪恭可

清容居士集卷第三十七

清容居士集卷第三十八

元 袁 桷 譔

表 牋附

進五朝實錄表

皇祖有訓聿成四繫之書大厯無疆允纘五朝之治夙陳
載筆上徹凝旒欽以邦啟治平運符熙洽禮樂刑政教化
之具炳若丹青典謨訓誥誓命之文昭如日月維累聖繼
承之述作實皇家混一之謀猷官謹具寮書嚴信史雖編
摩之匪一幸聞見之悉同欽惟陛下祇奉鴻圖光膺龍御
惟天佑于一德咸曰湯孫受命丕若歷年悉循堯道仁宣
孝治學廣文明臣某等職忝汗青官慙尸素帝王之制可

舉今已稔於鉅編詩書所稱何加願有光於億載

賀冊皇太子表

黼辰當陽首重升儲之建彤庭叶吉誕承鏤冊之頒宗社以貞幅員胥賀中賀切以天下之本在國在家皇極之言是彝是訓然知子莫若父故立嫡必以賢二美斯完羣情允屬信為非常之慶實開太平之基欽惟陛下駿命溥將燕一敷遺本支百世咸推受震之亨壽考萬年益著離明之象臣等濫巾臚仕欣觀上儀金石鏗鏘知協風之從律乾坤清晏瞻景耀之宣精

賀冊皇太子表

代宣徽院作

乾坤合德立鼇極以建中日月繼明奉龜圖而示吉誕敷

渙號允迪震亨

中賀

欽惟陛下寶歷儲祥璿源衍慶立嫡

以長遵三代有道之常受命於天膺萬年永保之裕惟知子莫若父故治國先齊家上當帝心下定民志臣等恪共內府欣際昌辰太極稱觴效驩呼而率舞寢門視膳嚴唯諾以致恭

賀正旦表

代宣徽院作

泰元衍策百二十日以為春乾御當陽於千萬年而受祐紫清叶奏丹陛傳臚中賀欽惟陛下盛德在躬至仁育物象闕而垂治法祖訓是繩獸樽以招直言皇猷滋闡嗣歲蒼規之始羣生玉燭之和臣等班辨外朝職嚴內宰雲迴龍袞肅瞻天日之光星拱鵠行虔祝岡陵之壽

賀武宗皇帝登極表

乘龍御天握純乾而居正斷鼉立極奠下土以宅中百辟
一心四方胥賀中賀欽惟陛下聰明合道智勇冠倫承詔
撫軍展素書之奇略登途受璽昭黃屋之珍符惟謳歌歷
數之有歸繫祖考神祇之允格丕基永紹景命不移羣後
后以來蘇政與民而偕樂臣等班瞻文陛瑞仰層霄頒度
量以朝諸侯三千同德垂衣裳而治天下億萬斯年

賀皇太后表

為都省作

六飛夾日奉大歷於聖人五色補天歸元功於文母事關
宗社慶浹宮闈中賀欽惟陛下教闡周南德參太極以慈
為寶夙資保佑之勤維道積躬聿致怡愉之養顯坤元之

光大卜鼎命之延洪臣等幸列周行欣承嘉會瑤池晝迴
樂四表之驩心玉殿春迴衍東朝之曼壽

賀聖節表

本院

天開景運篤有道之曾孫電繞神樞受介福于王母觚棨
瑞靄闐闐儀傳中賀欽惟陛下誕紹蘿圖丕承葆命至仁
育物得秋而萬寶成盛德在躬居所而眾星拱當立經陳
紀之始新省刑薄斂之規郊廟肇禋朝野胥慶臣等名汗
玉署日極璇霄廣文王有聲之詩載歌律呂衍中宗無逸
之壽虔祝華嵩

賀聖節表

代宗正府作

乾御當陽甫際中天之運斗樞繞電式臨彌月之祥絳闕

青葱瑤京肅穆中賀 欽惟陛下聰明合德孝友根心偃武
修文百神歆而九廟格敦本崇化皇極建而庶績熙爰開
有道之長斯衍無疆之慶臣等職縻邦憲身阻廷趨有王
者興行見溫洛榮光之瑞祝聖人壽願增泰元神策之書

賀皇太后冊寶禮成表 本院

蘿圖衍瑞丕昭景命之祥寶冊騰徽誕紀慈元之懿聖心
祇恪子道昭揚中賀 欽惟陛下稽古聰明事親愛敬有國
之母以長久致養聿嚴天道之要在陰陽飭躬彌謹禮行
中禁慶洽九圍臣等職近鼇頭班聯龍尾玉卮前壽肅瞻
長樂之儀彤筆特書願廣思齊之聖

賀皇太后冊寶禮成表 代宗正府作

黃鐘應律協陽德之初亨寶冊告廷奉坤元之至養尊歸
慈極慶洽治朝中賀 欽惟陛下愛敬積衷順承法道雍雍
肅肅聖實本於大任怡怡愉愉孝有光於唐帝日嚴初政
風動八方臣等恪謹國章欣陪班著瑤池晝迴幸預聞管
籥之音玉畢春融願虔祝岡陵之壽

賀皇太后冊寶禮成表 為都省作

乾旋坤轉定妙算於宮闈月吉辰良鏤徽音於典冊東朝
禮著九寓歡騰中賀 欽惟陛下聖嗣大任道希少廣以天
下母游神清淨之居惟泰元尊致謹怡愉之養允持慈寶
益屆壽祺臣等會弁鳩聯趨庭鼇抃陽回玉瑄八音首協
于黃鐘春滿瑤卮萬歲齊呼於紫禁

賀聖節表

寶歷建元協重華之嘉運瑤光貫月開上聖之貞符盛德
在秋昊天有命中賀欽惟陛下智仁御極孝友根心丕顯
王謨端拱巖廊之上達觀新邑式均道里之中取泰象於
坤乾合離明之日月璇璣叶紀玉斗儲祥臣等祇率班聯
肅瞻清穆宣昭鴻業載歌七月之詩者定武功願繼萬年
之雅

史局謝錫宴表

立朝載筆交懷愒日之慙就館肆筵申錫需雲之寵恩傳
宮醴光動廷紳中賀欽惟陛下黼黻先猷憲章祖武謂丹
青信史紀二聖之鴻文念鉛槧微勞屬小人而燕賚魚藻
歌騰於周室鳳簫聲遠於鈞天屆視朔以迎長粲飛霏而
奏瑞上追橐籥下陋權輿臣等愧匪食功懼惟飽德陽剛
初復太平歌既醉之詩天威不遠下拜祝無疆之壽

賀正旦表為都省作

會謹天朝文命敷于四海歷司人統攝提正於孟陬率由
舊章日為改歲中賀欽惟陛下道裁天地政在璇璣崇鄉
黨以厲賢才聿嚴親策詔郡國而謹牧養爰廣使軺東漸
西被以如春小往大來而交泰禮行雅壽捧瑤斝於東朝
親納直言開獸尊於前殿直惟平治允際亨嘉臣等祇率
鵷行肅登龍尾宏敷五典慙退食以罔功永保萬年敢矢
心而善頌

賀正旦表 本院

清臺課_歷允符顓頊之元明堂視朝茂正攝提之位陽迴
象魏儀贊鴻臚 中賀 欽惟陛下經緯人文財成天地審賢
良知古今之體能勵廉隅謂吏道以法令為師益嚴品節
剛健密參於太極怡愉澹謹於東朝車駕蒼龍導迎木德
樽開白獸詢採芻言臣等材乏頌椒恩叨給札春王正月
推五始之大原天子萬年納八荒於壽域

賀皇太后正旦表

歲在攝提叶孟陬之令月_歷符顓頊開太始之上元時屆
履端天綏眉壽 中賀 欽惟陛下清心慈儉至養怡愉數往
知來利永貞而坤厚體中居順祉元吉以泰亨徽音惟日

以恆新懿德如春而益暢臣等職叨視草才乏頌椒絳闕
五雲王母諭臨於黼座玉卮萬壽神堯親捧於瑤階

全德泰寧福慶皇太后尊號冊寶禮成賀皇帝表

為都
省作

皇矣上帝丕昭立極之功至哉坤元申行得名之典禮行
宮壺化被寰區 中賀 欽惟陛下敬養日嚴文明天縱謂聖
德無加於孝爰盡討論而天子必有所尊載揚徽美御未
央而登冊卽長樂以展儀鳳泊鸞飄寶刻永光於秦璽雲
蒸霧起翠華親下於堯階協氣醇和嘉生博厚臣等班聯
會弁壽介奉觴太微三光之庭烟燼交泰有名萬物之母
允合永貞

賀皇太后正旦表

丁巳為都省作

正月始和資坤元而蕃衍兩儀交泰綏壽祉以亨嘉德協
青輝瑞浮紫禁中賀欽惟陛下寶慈作則履順行仁龍袞
捧觴喜溢椒花之頌龜臺簇仗坐觀萸萸之祥審孫枝之
正傳定國本以蚤建邦家大慶朝野均懽臣某等祇率鷄
行式遵鳳曆正時成歲百廿日以為春利用厚生萬億年
而受祐

賀皇太后正旦表

集賢院

禕衣視且不彰立極之功鳳曆頒春誕合建邦之歲笙鏞
翁繹黼繡昭明中賀欽惟陛下道協母儀教參女史承顏
致養順德備於九重正位在中行願符於六五朝贊聖神

之治禁傳慈儉之謨臣等叨侍近班肅瞻嘉會玉卮為壽
儼寶殿以雲從金篋賜齡樂瑤池而晝燕

賀冊皇太子表

集賢院

前星定位仰宸極之聖謨陽月臨軒法坤元之慈訓光騰
鏤冊儀謹傳臚中賀欽惟陛下稽古行仁憲天合道知子
莫若父審恭敬之積中治國先齊家盡怡愉而致養惟宗
祊繼體之事大玩易爻重明之象漢著龜協祥乚邕承嫡
臣等職縻珍館班肅彤庭喜溢龍顏虎拜咸呼於萬歲禮
嚴鶴駕鸞和共後於三朝

冊皇太子賀皇太后表

集賢院

承天正位詒謀啟於重闈諷日揚廷渙號昭於寶冊大明

繼照萬邦以貞中賀 欽惟陛下色石功淡黃裳德順以似
以續降葆命以丕基是訓是行席蘿圖而端本知立嗣必
子之有白審建儲非私之惟公施于神孫繫我文母臣等
職塵清貫班肅上儀簫韶九成願盡稱觴之慶本支百世
式瞻主鬯之尊

皇太子兼中書令賀表

代宗正府作

黼展當陽懋對紫宸之慶元龜叶吉丕昭寶冊之光八音
播延羣公會弁中賀 欽惟陛下悅親有道立賢無方謂一
人元良勢實尊於藩翰而中書政本命尤慎於樞機孝友
宣昭仁慈溥博臣等恪司成憲欣覩綍儀卜七百年願衍
周家之歷上千萬壽咸趨漢殿之班

賀正旦表

集賢院

丹辰當陽頒發春之仁政清臺治歷符建國之昌期日之
方中天其申命中賀 欽惟陛下澤漸滲漉心玩神明盤銘
監觀德又新而無斁河圖則象祉元吉之有恆獸樽設席
以招言龍袞坐朝而問道臣等瀛洲布武閭闔詔儀玉燭
豐穰用制九年之蓄紫清蠖濩業隆萬世之基

賀皇太后正旦表

丙辰爲都省作

歲指蒼龍密叶昭華之瑄雲開榆翟首稱長樂之觴順履
始和懋隆元吉中賀 欽惟陛下儉慈作則清淨頤神色石
功淡妙裁成而交泰黃裳位正盡滲漉以皆春母儀循四
序之周聖孝衍三朝之祉臣等職叨輔相效愧燮調拜捧

椒花慶載臨於元日宴觀桃實祈永保於萬年

賀正旦表

壬戌本院是歲閏五月

肇祚發春仰正陽之布治歸餘成歲審長至以觀生黼展
昭明彤庭肅穆中賀欽惟陛下仁推滲漉道協際蟠修德
錫符驗陰陽之消長發號出令則天地以裁成念丕圖演
繼于祖宗究盛禮益嚴于上下臣等瀛洲接武文石趨班
閏月定時泰治密齊於七政皇極錫福北元永保於萬年
賀太皇太后正旦表

地天交泰陰教法乎坤元閏餘歸終寶曆增于夏五陽浮
中禁瑞藹重闈中賀欽惟陛下端懿母儀慈明內範怡神
少廣悟黃中通理之爻辨秩東郊樂青焯登平之景曰惟

肇歲茲用儲祥臣等給札承恩肅班稱慶筆徽音於彤管
歲不絕書望長樂之璇宮天惟曼壽

進仁宗皇帝實錄表

君臨十載式昭垂世之謨聖治萬方庸謹繫年之錄編摩
玩愒敷奏凌兢欽以仁宗皇帝陛下濬哲積躬欽明稽古
發揚乾健預清宮以候先皇祇奉坤元虔問寢而娛太母
審俗周知於民瘼授時彌切於歲豐謂養性存心宜採於
傳記而脩身治國必取於禮經監觀歷代之著龜夷攷前
王之軌範政要採諍臣之讜議大學芟衍義之浮辭爰譯
成書用裨博覽至若譽髦斯士擢不次以待非常爵人於
朝表有功而抑妄進每遵帝範肇立儒科廣祖宗百年未

備之規示子孫億代永貽之訓珠玉非寶旁招菁莪之賢
 農桑惟勤旋致嘉禾之瑞惡衣服以申緣履之禁省畋獵
 以彰開網之仁增胄子之官資限計吏之品級為民請命
 匪營一己之福田遇裁秉誠果應自天之甘澤與人不求
 備從諫如轉圜河徙故灘謫斂臣於嶺徼雪淡前殿憫戍
 卒於邊防常思創業之艱益慎守成之效道傳精一明授
 受之至公孝竭怡愉協繼承而無間凡茲殊美冠乎羣倫
 濡毫惟懼於荒蕪削牘復虞於缺軼雖盡巧心於舉要蔑
 窮茂績之救功欽惟陛下葆命誕膺鴻圖不顯窮神知化
 彰明聖之鋪張詢事考言採臣鄰之記注屢宣睿旨迄萃
 鉅編雖天地之德無俟於贊揚而日月之光有資於繪畫

臣等職叨率屬識乏簡僚慕永貞之謹嚴詞慙韓愈稽太
 初之直核筆愧馬遷

舊制進實錄表文有短長然未敢以數聯直致伏觀
 聖朝二帝實錄進表必加詳盡摘其所行事跡以序
 篇首稱大德中嘗進五朝實錄表未免倣效前作今
 輒不揆遵守舊制撰成一篇或恐繁蕪別有副本庶
 便宣讀

又

十年御極聿脩四繫之編億載揚休殊乏三長之筆祇成
 信史上徹宸旒中賀欽以仁宗皇帝陛下仁靜根心溫恭
 合德詩書造士闡學制以設科法律為師嚴官規而限祿
 誡經作則稽古鑒今所寶惟賢卻獻瑛而弗尚莫大於孝
 謹視膳以彌加著龜定主鬯之公棧樸藹奉璋之眾宜登

琬刻永祕縑緇欽惟皇帝陛下慕切羹牆令行金石率時
昭考撫言行以無遺迪惟前人繼聖明而有造臣等尊聞
傳信竭思纂題閱歷歲年已浹慙於尸素經緯日月期不
朽於汗青

賀正旦表

癸亥爲
都省作

歲正天門陳揆治朝之位歷新人統肅嚴魏闕之班四表
迎祥八風順律中賀欽惟陛下仁施滲漉命受溥將輔相
財成別忠邪而無黨斟酌損益合禮樂以同流圭璋藹多
士之良玉燭兆大田之慶準繩乾健橐籥泰亨臣等補袞
功慙更弦政拙萬年永錫仰瞻太極之尊六甲旣周行履
上元之運

賀聖節表

癸亥爲
都省作

十月爲陽於赫發祥之兆一人有慶丕昭嗣服之初出日
之升降年以永中賀欽惟陛下斂時錫福握乾闥珍玩天
地之心陽初升而來復發雷霆之令陰早辨於履霜繩祖
武以雍熙格民風而醇厚道尊泰壹運接上元臣等叨列
近司欣逢盛旦望翠華之行御瑞藹五雲趨絳闕以傳臚
齊呼萬歲

牋

賀皇太子受冊牋

爲都
省作

禮嚴中禁位建承華萬國以貞咸曰吾君之子四方來賀
永底烝民之生中賀敬惟殿下玉璞蘊珍金枝表秀繼體

而承七鬯如歲之春定志以協著龜維天其祐方謹雞鳴
之問聿新鶴禁之居某等叨列政司欣傳制命父子君臣
之道備允廣緝熙詩書禮樂之教崇式符繼照

賀皇太子受冊牋

代宣徽院作

範金作寶禮成內朝簇仗演綸驪騰四字協春秋之大義
覃雨露之殊恩 中賀 敬惟殿下岐嶷天成溫文夙就佩規
帶矩正言正事之教成執玉奉盈事父事君之道備某等
叨司庶府欣觀盛儀仰黃道之日長式符離照候明堂之
星潤允謂震亨

賀皇太子受冊牋

本院

體元更始肅瞻玉裕之姿崇德計勳肇錫朱明之服宗支

襲慶國本奠安

中賀

敬惟殿下英睿夙成藝文天縱清宮

朝邸朱虛之功為高審俗迎郊孟侯之賢允似受介福于
王母繼明照於四方維軍國之樞機實政化之橐籥名倡
百辟兩儀正而五緯齊德和萬邦九穀熟而三農足某等
職叨掌綍欣觀揚庭紀王子之吹笙有慙斧藻歌堯民之
擊壤願廣丹青

賀皇太子受冊牋

代宗正府作

盛德動天誕受元良之冊萬邦為憲悉資文武之賢政本
增崇皇基鞏固 中賀 敬惟殿下圭璋王度黼黻聖謨整齊
乾坤指揮於旋轉之頃肅清宮廟怡愉於定省之間亶惟
不世之勳庸舉非常之典某等職司宗籍欣觀王綸磐石

既安願上則百斯男之頌權衡允稱克成曰三有俊之功

賀皇太子正旦牋

為都省作

歷起上辛啟自天之申命歲行維戊瞻出日之重光萬宇
薰陶九垓滲漉中賀敬惟殿下功調玉燭政察璇璣宴錫
龜臺密承歡於王母仗移鶴禁親奉壽於神堯維春之祺
有秩斯祐某等導迎嘉節贊詠清時候銅瑋之陽和式占
泰定望青宮之葱鬱允協震亨

賀千秋節牋

代太保府作

月映彩雲慶仰猗蘭之瑞令行青陸書占元馭之祥維春
之祺粵上斯已中賀敬惟殿下宅心聖學匡力皇圖廣邦
家太平之基澤窮滲漉察天人同心之理下逮芻蕘仁孝

合名中和叶德某等展儀穀旦俟首叢霄壽考萬年敢陋
千秋之頌本支百世願陳大雅之詩

賀千秋節牋

代詹事院作

甲觀畫堂仰紀吹銅之瑞瑤山玉彩特書主鬯之勳維莫
之春初吉云已中賀敬惟殿下蒼規體德銀漢儲祥稽七
政之有恆實循冬夏消羣陰於交泰爰法坤乾興鴻文以
闡基握龍圖而佐運兩宮定省雍容化日之長四表謳歌
瞻後前星之耀某等具寮無補盛且有光奉曲水之羽觴
齊呼曼壽揆泰元之神策允謂延洪

賀皇太子正旦牋

本院

青規紀歷甫開嗣歲之祥蒼震布和懋協少陽之象自天

申祐與物爲春中賀敬惟殿下經緯人文權輿政治三朝
交泰聿嚴盛禮以奉觴四德尊乾行美成功而瑑玉卜稔
已符於祈穀登賢淡味於拔茅慶洽宮闈仁施寓縣某等
叨塵顧問欣覩亨嘉聲徹鳳笙仰非霧非煙之瑞班隨鶴
駕歌重暉重潤之詩

賀皇太子正旦牋爲都省作

歲正璿璣不應震亨之象春先寶曆允符泰治之祥絳闕
光華青宮葱鬱中賀敬惟殿下道隨陽長德與日新玩易
中行密包荒而塊圮法天繼照永主器以彌綸稱觴前殿
以承顏侍宴瑤池而受福某等禮成鶴禁敬謹鳧趨祈穀
躬耕預卜金穰之兆頌椒介壽欣瞻玉裕之姿

賀皇太子受冊牋集賢院

明堂辨儀哀對重輝之耀昕朝發冊丕昭上嗣之賢宗社
枝寧幅員驩慶中賀敬惟殿下孝仁生稟禮樂夙脩一人
元良羽翼靡煩於商皓百揆時序英威共仰於秦王鶴駕
之御日三鳥輪之光明兩某等叨塵仙館末綴臚庭瀛水
汪洋望瑤山而親切宸居蠖濩瞻青路以陪從

賀皇太子正旦牋集賢院

大曆更新叶皇祖建元之祚少陽正位隆神孫承嫡之基
百辟是儀五辰攸敘中賀敬惟殿下應乾作命受震行仁
嘉禮告成歸妹祉吉之象外朝佐治同人文明之祥日就
月將而緝熙小往大來而分類某等肅瞻玉裕謹候青燁

詠歌重光紹天休而繼照彌諸庶績占歲在之有年

賀千秋節牋

國恤未餘月百司皆擬賀表非禮後不進

電繞斗樞允昭甲觀之瑞日昇暘谷行受明堂之朝宗社底寧神祇協相中賀敬惟殿下欽文師古剛健法天或躍在淵龍德合乎中正永言配命龜圖闡其延長仰震夙之非常審傳付之素定某等肅瞻睟表獲際重光聖孝有加羹牆之慕彌切民情共戴岡陵之祝益虔

賀千秋節牋

本院

心居天位前星耀於明堂卯為春門大電騰于甲觀盛德集福至和儲祥中賀敬惟殿下體仁法元師古合道溫恭事帝密贊化以生成問學積躬益緝熙而光大疇選黃髮

之彥庸佐青闈之規如日之升降年有永某等肅瞻英偉虔祝簡穰輯往則於瑤山一辭莫措採賜齡之金篋曼壽是期

賀千秋節牋

為都省作

元馭發祥不顯吹銅之瑞蒼龍協紀式昭主器之符紫禁權騰璿源秀衍中賀敬惟殿下溫文秉度仁孝積躬侍宴瑤池令德令儀之可述問安內寢正言正事之足聞如歲之春自天其祐某等導迎穰簡贊詠中和瞻出日之舒遲重光允繼望彩雲之葱鬱曼壽是期

賀皇后正旦牋

本院

王春謹時肇正內朝之治帝歷更始益嚴中禁之儀與物

咸亨自天作合 中賀 敬惟殿下矩循內則言法徽音關睢
 詠歌禮避乎蘭殿之貴卷耳思念頌取于椒盤之文稽陽
 德維如歲之初考陰教曰履端于始某等清班接武穀旦
 趨朝日月竝明願上千萬之雅壽天地交泰載歌元二之
 太平

清容居士集卷第三十八

